



UPA 2014/20+21-aappasaaneernera
Andreas Uldum

Naalakkersuisut suliffissaaleqinerup ataavartumik akiorneqarnissaanik siunertaqartumik ataatsimoorussamik pilersaarummik piaartumik suliarinninnissamik peqquneqarnissaanik Inatsisartut aalajangiiffigisassaattut siunnersuut. Pilersaarummi Sanaartugassanut Iluarsagassanullu Aningaasaateqarfimmi aningaasat uninngaannartut inuiaqatigiit akornanni sulisinneqalernissaanik, nunaqarfinni aalisakkerivinnik sullissinissamut isumaqatigiissutinut aningaasaliissutit amerlineqarnissaanik kiisalu illersorneqarsinnaasumik aalisagartassat amerlineqarnissaanik imaqassaaq. Pilersaarut Inatsisartut ataatsimiinneranni maanna ingerlasumi saqqummiunneqassaaq.
(Siumup Atassutillu Inatsisartunut ilaasortaataitai)
(Aappasaaneernera)

Nunatsinni annertuumik suliffissaaleqinerup piaartumik ataavartumillu annikillisinneqarnissaa siunertaralugu Naalakkersuisut ataatsimoortumik periusissamik Inatsisartunut saqqummiussaqaarnissaanik Inatsisartut aalajangiiffigisassaattut siunnersuut.
(Inuit Ataqatigiit, Partii Inuit aamma Partii Naleraq Inatsisartunut ilaasortaataitai)
(Aappasaaneernera)

Demokraatini nuannaarutigilluinnaqqissaarparput Inatsisartuni partiit tamarmik suliffissaaleqinerujussuup akiornissaa isumaqatigiissutigimmassuk. Tamatta suliffissaaleqinerup aningorniarnissaanut assigiinngitsunik isumaqarpugut tamannalu tunngavigalugu torrallaanngitsuunngilagut imatut allannguuteqartoqarnissaa isumaqatigiissutigigatsigu:

Nunatsinni annertuumik suliffissaaleqinerup isumaliutissiissummut ilassummi immikkoortoq 2.1-mi taaneqartut aallaavigalugit ungasinnerusoq isigalugu suliffissaaleqinerup annikillisinneqarnissaa siunertaralugu Naalakkersuisut ataatsimoortumik periusissamik Inatsisartunut saqqummiussaqaarnissaanik Inatsisartut aalajangiiffigisassaattut siunnersuut.

Allatut ajornartumik partiit isumaqatigiissummut peqataasut arlaannaataluunniit suliniutissat anguniagassallu taaneqartut tamaasa isumaqatigisinnaanngilaat. Aamma taamaappoq Demokraatini.

Uangutsinnut pingaaruteqarsimavoq, inuussutissarsiortunut atugassiissutitta qiviarnissaat. Tamanna tunngavigalugu iluarisimaarparput, misissorneqartussanngormat, sulinerup akileraartarnikkut pilerinarnerulersinniarnissaa. Aamma ilanngullugu misissorneqassaaq,



akissarsiatigut akileraarutit, ingerlatseqatigiiffiit akileraarutaat aamma nalikilliliinissamut periarfissarissaarnerunerit suliffeqarnermut sulisartunullu qanoq sunniuteqartarnersut.

Demokraatini isumaqarpugut manna tikillugu suliffinnik ataavartunik pilersitsinissaq suliniarfiginikippallaarsimasoq. Suliffiit ataavartut assigiinngitsunik ingerlatsinermut tapiissuteqarnikkut pilersinneqarneq ajorput aamma aningaasaliissutissatut aalajangerneqareersunik siuartitsinikkut. Suliffiit ataavartut pilersinneqartarput sullivimmik aallartitsinissat ingerlatsinissallu pilerinarsarnerisigut. Suliffit akileraartarnikkut oqittunik aaqqiiviginerisigut. Suliffiit aningaasaliinissaannut periarfissaannik oqilisaassinikkut pitsaanagerusunik nalikilliliinermi periarfissiinikkut. Aamma inuiaqatigiinni inuit tamarmik akissarsiarissaarlutik ulloq unnuarlu suliffimminnik paarsilluarnissaasa qularnaarnerisigut.

Taamaattumik Demokraatini piumasarisimavarput, taasakka ataatsimoorluni isumaqatigiissutinut ilanngunneqarnissaat taamaattumik partiit sinneri aamma qutsaviginiarpagut piumasaqaatitsinnut paasinnilluarsimammata.

Demokraatini qulaani taaneqartoq siunnersuut Inuussutissarsiornermut Ataatsimiititaliameersoq tunngavigalugu inassutigissavarput allannguutissatut siunnersuut akuerineqassasoq..